



ENRIKE ZUAZUA

Datuen garaia

San Andres berriz, urtea bukatzeaz dagoenaren seinale. Eta aurtengoa gertakariz jositakoa izan da. Lurraren biraka abiadura betikoa da, baina lurrzalean geroz eta abiadura gehiagoz bizi gara den denok.

Izaniko gertari batzuk media guztietan hainbat lerro eta ordu bete dituzte: Erresuma Batuan *Brexit*-aren alde bozkatu zuten hiritarrek, Kolonbian bake-itunaren kontra, Estatu Batuetan, duela egun batzuk, Trump-en alde. Eta guzti horietan azkenean gertatutakoa aurreikuspenen kontrakoa izan da. Gure izaeraz bultzaturik, zentzuzkoena dena iruditzen zaigu beti aurrera atera behar duela. Baina ez da horrela, tamalez, ez eskala txikian, ez eta mundu mailako auzi hauetan.

Prospekzio inkestaren profesionalak ere sarritan erratu dira hauteskunde eta erreferendum hauen emaitzak aurreikustean. Zientzia aurrera doa arlo guztietan. Inoiz baino tresna hobek ditugu. Baina ez dugu asmatzen. Zergatik? Agian jendeak ez du, ez dugu, zintzoki erantzuten egiten dizkiguten inkestei. Mesfidantza ugaritu da gure gizartean eta horrek ez die ohizko inkestei laguntzen.

Gaur egun, sarritan, sare sozialetan gardenago agertzen dira gizartearen pultsua hartzeko behar diren datuak. Han, ordenagailu edo sakelako pantaila nano baten aurrean, sarritan, erosoago azaltzen dugu gure benetako gogo eta asmoak, inork galdetu gabe. Informazioaren gizarte berriaren paradoxa galanta. Internetek ez ditu soilik gure eguneroko ohiturak aldatu, baizik eta, bereziki, gainera, gizartearen espresiorako plataformak.

Gaur egun hitzek ez diotena, sarean bildutako datuek aitortzen dute. "Big data" arlo eta jardun zientifikoa derrigor pil-pilean egon behar. Nola ez. Nola bestela egunero garen milaka milioi gizaki guztiak sortzen ditugun datuak antolatu, aztertu eta erabili? Datuen garaian bizi gara, nahi edo ez, gau eta egun.

Sailburu kargua hartu dau Arriolak

Iñaki Arriola sozialistak eta alkatelariak astelehenean zin egin zetsan Eusko Jaurlaritzako Ingarugiro, Herrilan eta Etxebizitza sailburu karguari. Izendapenaren harira Arriolak egindako adierazpenen arabera, "ohorea eta erantzukizuna", gauza bixak ekarri detsaz kargurako izendatziak. Halanda be, aurretik be, Patxi Lopez lehendakariarekin Etxebizitza eta Garraio sailburua izan zala gogora ekarritza, "kargua ezaguna egiten jakola" gaiñeratu eban. Eusko Jaurlaritzako hamaika sailburu berrak karguari zin egin zetsen astelehenean Ajuria Enea jauregixan. Formula tradizionalari jarraituta, Gernikako Estatutuaren ale baten gaiñian eskuak jarritza egin zetsen zin karguari, hau da, "Euskadiren zerbitzuan" eta "legearen arabera" hartzen daben agintia "zintzo eta leialki" erabiltzia hitz emonda.



Santa Barbara ospatuko dabe museuan

Domekan, abenduaren 4an Santa Barbara eguna ospatuko dabe Armagintzaren Museuan. Bestiak beste armagiñen zaindarixa dana goguan, Museuak ate irekixen jardunaldixa hartuko dau egun osuan eta, beraz, bisitan doiazanak ez dabe sarrerarik ordainduko. Horrekin batera,



ikusgai ez daguazan armak gordeta daguazan biltegiara bisita gidatuan juateko aukeria eukiko dau nahi dabenak, 10:00etan, 11:00etan eta 12:00xetan (gaztekeraz, talde bakotxian 10 lagun hartuko ditue). Eta umiendako, barriz, "Barbararen Burrundarra" taillarra preparau dabe (elebiduna). 20 lagunendako tokixa dago eta ordutegi jarraixan, 10:30xetatik 13.00era eskinduko dabe. Dohaiñik izango dira, baiña izena emoteko 943 708446 telefonora deittu edo museoa@eibar.eus helbidera idatzi biharko da.

Matxismuaren kontrako zapatak

Aurreko barixakuan Indarkeria Matxistaren Kontrako Nazioarteko Egunaren harira hainbat jarduera berezi egin ziran gurian be. Nalua gazte feminista taldiak Untzaga plazia oiñetakoz eta mezuz betetzia lortu eban, "Plaza Bete Zapata" kale-ekintzarekin. Horrekin batera, Udaleko Berdintasun Zerbitzuak eta Eibarko Emakumeen Mahaiak antolatuta, indarkerixa matxistaren kontrako martxa eta konzentraziñua egin ziran. Eta gaurko, barriz, eraso sexualen inguruko "World kafea" antolatu dabe Silistasuna Hautsiz alkartekuak, Udaleko Berdintasun Zerbitzuaren laguntzarekin. Ekitaldixa 18:00etatik 19:30xetara izango da, Portalean (ikastaro gelan).

